

平

桂

紀

曙

卷緒
己丑
七月開
輝

廣

韻

略

忠

錄

炎緒己丑

十刀開彫

平桂紀畧卷一

道光三十年庚戌春正月朔日食

武宣賊陳阿貴竄柳州敗走桂平知縣李孟羣擒誅之

阿貴武宣人與陳香晚聚黨數千人道光二十九年秋陷修仁荔浦旋經官兵克復竄柳州提督向榮敗之走匿桂平羅淦山中桂平知縣李孟羣擒誅之香晚竄賓州亦爲官兵所獲

雷再浩李沅發作亂竄龍勝同知吳德徵都司鄧宗武擊卻之參將瑪隆阿亡於陣賊入綏寧破門村宗武及守備蘇秉華千總周榮追賊戰死

道光二十七年雷再浩李世得在新寧全州界猺山內倡習邪說立棒棒會聚眾潛出劫掠新寧官

兵捕之再浩拒捕遂謀作亂以李亮易朝等爲頭目犯全州廣西提督馬殿甲赴西延督剿獲誅世得再浩退入新寧山中亦爲官兵所獲餘黨潰散復歸李沅發二十九年冬陷新寧縣城湖南官兵旋克復沅發竄興安三十年春復由城步竄龍勝同知吳德徵都司鄧宗武迎擊參將瑪隆阿陣亡賊敗入綏寧由懷遠竄古宜破門村村宗武率衆追賊至陰木坪值賊由門村出大雨火器不然與守備蘇秉華千總周榮皆戰死賊竄湖南貴州邊界爲兩省官兵截剿復入廣西

二月賓州賊陶八丁四犯上林踞蘆荻三村

陶八丁四糾黨二千餘人犯上林土賊周四等導入大山踞蘆荻三村署思恩府劉繼祖剿之不克執上林縣知縣清泰去旋釋之竄上里墟復糾土賊韋添芬犯武緣乘間薄思恩府城踞鄧墟署思恩府知府馬麗文擊敗之陶八窮蹙就撫易名昌培

土賊石牛四入遷江大掠而去

石牛四名覃石養貴縣人糾黨襲入遷江大掠而去旋散匿賓州知州陶錫圭捕獲之

三月李沅發竄永福堡里賀縣縣丞賴錦榮陣亡

錦榮防守永福堡里聞賊至迎擊於下白里村陣亡賊由三百里村竄永福

四月湖南提督向榮擊李沅發獲誅之

沅發爲楚軍擊敗復竄廣西融縣縣丞孟永福陽朔荔浦等處入修仁猺山修仁縣知縣劉益謨誘殺其黨甚衆沅發退回新寧金峯嶺據險爲巢以拒官兵湖南提督向榮率師破其巢沅發匿巖中爲團練所獲

貴縣桂平土人來人相鬩

貴縣桂平土著獐人曰土廣東潮惠人曰來來人富豪溫某豔土人女美欲娶之誘女夫家退婚不可溫欺其弱竟娶之遂起釁相仇殺來人敗走田舍皆爲土踞來人無歸者皆附於金田賊以叛

五月貴縣賊顏八李四據來賓古昔墟攻陷縣城大掠而去

六月桂平縣金田村賊洪秀全作亂

秀全廣東花縣人與其黨馮雲山客桂平宜里金田村僞撰妖書詭云神授謂將有大災惟拜上帝可免立會曰上帝以天爲天父耶蘇爲天兄潛布僞書煽惑鄉愚時廣西土寇竄起人心搖惑附從者益多知府顧元凱知縣王烈捕雲山訊之遣解回籍途中逸去復至金田與楊秀清韋正蕭朝貴等蓄髮謀逆秀清亦廣東人詭言天父下降附其身詭人陰私擿發之羣驚爲神蕭朝貴自稱天兄韋正更名呂輝與胡以光陳玉書皆土豪入會者也起事時秀全匿以光家秀清率衆迎之至金田旋移屯武宣縣東鄉招集亡命廣東海寇羅大綱貴縣龍山墟賊石達開皆擁衆歸附秀全勢日熾

洪秀全遣韋正襲敗官軍於新墟

賊踞鵬化署按察使司楊彤如遣督帶水師知府劉繼祖桂平縣知縣李孟羣由新墟水陸進剿賊乘兵練甫集夜襲新墟官軍驚潰

廣東英德賊寇懷集人賀縣南鄉據大會墟官軍失利遂由黃田逼縣城據河東沙岸兵練夜渡襲之皆遁走

八月太平府賊潘寶源陷龍州署太平府龍州同知王淑元死之

寶源聚眾稱大勝堂八月犯龍州淑元與次子光頡率團練往禦戰敗賊越城入大掠淑元及光頡皆遇害寶源竄隆安旋陷果化土州署隆安縣知縣李葆初外委張國樑剿之竄上林元年寶源中死

艇賊任文炳大掠平南

任文炳與張釗田芳梁阿長關福皆波山艇賊也三十年春思恩府劉繼祖撫張釗田芳旋叛去別爲一隊任文炳與梁阿長等聚眾二千餘人秋大掠平南時潯梧兩府沿江艇賊縱橫水道不通賊頭目甚眾皆互相糾結其後梁培友遂爲水路總管統攝羣醜而賊勢日張矣

九月土賊黃阿佑圍攻慶遠兵練擊之

廣西提督向榮率湖南兵出慶遠

金田賊至武宣象州招集醜類旋回金田而慶遠思恩各屬土賊乘勢蜂起官軍屢戰不利巡撫鄭祖琛疏請飭固原提督向榮由湖南入廣西會剿

土賊黃晚陷賓州守備田芬死之

黃晚與其黨覃興晚嚴阿文張阿曾等踞慶遠德勝鎮三十年興晚分黨犯忻城阿曾犯上林

九月黃晚陷賓州守備田芬遇害旋竄思恩走河池大肆焚掠而阿文復糾黨犯慶遠府城思慶所屬焚掠幾遍

慶遠賊陳晚陷忻城土司據之

土賊嚴阿文黃晚張阿曾犯慶遠旋襲陷河池州

阿文等由遷江入襍洞聚賊五千餘人攻府城爲兵練擊退阿曾屯洛東洛西攻河池州不克退據六塘分擾金城江旋襲陷州城而去

十月提督向榮及賊大戰於慶遠索潭墟再戰於賓州陶鄧墟獲黃晚誅之

榮及賊戰於索潭再戰於陶鄧墟所向皆捷黃晚由河池出援大敗擒僞軍師龐五王二等黃晚逸去匿山中其妻父梁順益導官兵獲誅之

河池州平洞賊黃臣用犯州城官軍擊卻之

平洞賊黃臣用糾黨二千餘人稱洪勝堂圍攻河池州城官軍擊卻之竄南孟

橫州賊謝錫祥踞橫州靈竹墟提督向榮移軍白水

浪

謝錫祥綽號長腰四橫州人嘯聚千餘人踞靈竹墟旋入陶墟向榮自遷江移軍白水浪錫祥敗竄隆州奉議州州判易見心撫之旋叛去合游賊袁晚謝八等寇百色

上命前陝甘總督林則徐來視師行至廣東之潮州卒

土賊顏品瑤陷隆安

道光二十八年流賊李自昌張家祥蘇三相等糾眾劫掠村堡自昌死家祥三相黨日盛屢抗官軍

遊擊鄧宗恒段炳南都司張志和先後陣亡左江鎮總兵盛均不得已撫之賊窺官軍弱竊聚紛起三十年十月顏品瑤擁眾萬餘人破隆安竄新隘左江一帶騷然後爲其下張晚所殺其黨散去各爲頭目而左江自此多事矣

十一月潯州協副將李殿元都司宋煜率兵討金田賊潰於思旺秦川巡檢張鏞陣亡

雲南提督張必祿卒於潯州鎮遠鎮總兵周鳳岐領其軍

必祿率黔兵二千人來粵會剿至潯州卒

官軍剿金田賊敗於黃牛嶺副將伊克坦布千總田繼壽把總楊萬福潘繼邦劉洪海保定清何其莊皆

陣亡

十二月欽差大臣李星沅至桂林

星沅養親在籍上命爲欽差大臣赴廣西與巡撫周天爵會同剿賊十二月初二日至桂林十三日出駐柳州疏請益兵時向榮帥楚兵二千駐橫州雲南總兵李能臣率滇兵二千駐果化星沅皆調赴潯州復疏調貴州鎮秦定三帥黔軍赴潯會剿賊聞三省兵將至悉衆出大黃江以抗官軍義勝堂賊寇百色至果化土州署同知孫蒙總兵李能臣擊走之

咸豐元年辛亥春正月官軍擊金田賊敗於牛排嶺
守備王崇山千總湯成陣亡

向榮及李能臣周鳳岐統滇楚黔兵進駐平南馬鹿嶺元年正月十八日及賊戰於牛排嶺官軍敗

退官塘賊
踞大黃江

土賊劉入寇博白鴉山堡遂犯縣城知縣游長齡擊
敗之走陸川

廣東廣寧賊曾阿昌由開建犯賀縣

曾阿昌與溫大貨五皆廣寧人爲盜拒捕逃入懷
集糾土賊黃顯等踞舖門墟逼賀縣城下平樂都
司周慶龍自梧州帶練勇來援廣東副將齊清阿
參將左忻統兵會剿戰於四面界齊清阿左忻皆
陣亡阿昌復擁衆回廣寧後爲
廣東兵練追擊於清遠獲之

二月初八日金田賊焚江口及牛排嶺踞紫荊山出
屯武宣之東鄉巡撫周天爵奏調廣東副都統烏蘭
泰入廣西會剿

雲南師宗縣賊陳三陷西隆州泗城府知府徐堉督師克復賊竄舊州

廣東信宜賊凌十八犯鬱林圍攻四十日解去

三月李星沅自柳州進駐武宣十二日卒於軍

星沅以諸將不協自往武宣視師舟中舊疾復作未便乞假疏請關防暫交署撫周天爵上命回籍養疾諭至星沅已前卒矣

四月金田賊入象州中坪墟

賊由廟旺入象州中坪墟周天爵營象州城南向榮營烏木烏蘭泰營百丈賊不能上復回東鄉

宣化土賊林一昌踞丁當墟知縣彭昌集討平之

一昌與土賊葉大顏晚等聯合葉大稱得元堂踞隆安之喬建墟一昌稱連勝堂踞丁當墟復破武

緣仙湖伏肥等村昌集率練勇往剿獲一昌族誅之

廣東信宜賊凌十八犯陸川旋犯鬱林巡撫周天爵使按察使楊彤如總兵李能臣擊走之

凌十八上帝會黨也道光二十九年魏昭成行其教於陸川博白土賊蠡起十八糾黨至二千餘人以王晚爲軍師凌二十八爲先鋒咸豐元年夏犯陸川縣城不克旋犯鬱林逼攻數次城幾陷知縣張晉圭阮正惠率師來援皆失利團總梁拱宸梁景勲羅亦綵等皆陣亡王晚每出戰詭裝異服鬼面如戲指揮說法喃喃鼓樂前導諸賊猖狂跳舞隨之遇者輒靡時巡撫周天爵駐潯州遣按察使楊彤如總兵李能臣倍道進兵營於福棉總兵王錦繡率所部來會連戰皆捷斬僞軍師王晚等數百人十八竄廣東化州旋據羅定州之羅鏡墟廣東官軍討平之劉八者上帝會黨與凌十八同起於信宜劉八分黨攻博白知縣游長齡擊卻之斬僞將軍張二頭目盧八等劉八竄回信宜後於